

The return to Madina
Jab Zaaeraan-E- Shaah Ghareebul vatan Phire
(Poet: TBD)

Jab Zaaeraan-E- Shaah Ghareebul vatan Phire
Yaani Sooe vatan Haram-E- Panjetan Phire
Ek Dast Tohfa Leke Nishaane rasan Phire
Ghul Tha Ke Ahl-E-Baith-E- Hussain Aur Hassan Phire

Sattar Do Tan Ko Zair-E- Zameen Sounp e Aaye Hain
Kuch Surre Qaake-E- Paak ye Hamraah Laaye Hain

Azbaab sab luta hua, Khaima jala hua
Aur zeen e Zuljanah laho se bhara hua
Moo par ghubaar e gunj e shaheedaan laga hua
Damaan e maatami kafani ka phata hua

Bache bhi kooze paani ke haaton me lete hain
Peete nahin hai fateha Asgher ka dete hain

Naagaah Guzar Qaafele Ka Shaher Me Huwa
Aur Lashkar-E- Basheer Me Naqqaara Bhi Bajaa
Awaaz e Taiz Gaami-E- Aspan Huwi Bapaa
Hamsaiyoun Ko Fatema Sughra Ne Di Sadaa

Logo Sawaari Aati Hai Kis Baadshaah Ki
Sab Ne Kaha Ke Sibte-E- Risaalath Panaah Ki

Itne Me Umme Haaniya Usdam Falak Wiqaar
Sar Par Qazaa Ba Paaun Me Mouze Bhi Aashkaar
Ummul Baneen Ke Saath Wahaan Aai Aik Baar
Sughra se Poocha Ab To Na Hoga Tumhain Buqaar

Ghul Hai Ke Zainab Aati Hai Shabbir Aate Hain
Chalthi Ho Tum Bhi Hum Tho Unhain Lene Jaate Hain

Wo Boli Paishwaai Ko Mowjood Hoon Magar
Hai Qasd Chup Rahoon Kisi Goshe Me Baith Kar
Akbar Talaash Me Phirein Aawaaz Dain Pidar
Asghar Bhi Ghutniyon Mujhe Dhoonde Idhar Udhar

Jab Sab Kahen Ke Margayi Chut-Te Hi Aap Se
Hansthi Huwi Main Aake Lipat Jaaun Baap Se

Ummul baneen ne paya jo balwa miyan e raah
Soghra ko leke godh me baythee ba iltejaa
Aur shaher me shuroo hui aamad e sipah
Sab lashkar e Basheer ki poshaak thi siyah

Barpa thi har khadam pe sada shor o shain ki
Ghul va zabih ka to nida va Husain ki

Ek Martaba Saron Pe Pade Mard-O- Zan Ke Haath
Jaana Sabhon Ne Qatl Huwe Shah-E- Naik Zaath
Soghra Ne Poocha Daadi Ye Kaisi Hai Waaredaath
Ye fowj To Gayi Thi Na Mere Pidar Ke Saath

Hae Hae Musaaferon Pa Mere Kya Guzar Gayi
Poocho To inse Fowj-E- Hussaini Kidhar Gayi

Aaqir Na Rah Saki Sooe Lashkar Ye Di Nidaa
Tum Karbala Me Taaza Mulaazim Huwe Ho Kya
Akbar Ke Paae Naam Hai Tum Logon Ka Paraa
Baare Kaho Guroh e Hussainin Kahaan Rahaa

Batlaao Momino Main Hoon Pyaari Hussain Ki
Ab Kitni Door Hogi Sawaari Hussain Ki

Naaghaah Aaya Syedon Ka Ghol Nange Sar
Daamaan-E- Sabz Kurton Ke The Chaak Sar Basar
Aage Alam Liye Huwe Ek Tifl-E Be Pidar
Maatam Ke Neel Chaand Se Seene Pe Jalwagar

Mashkeeza-E-Sakina Alam Me Bandha Huwa
Ek Teer Usme Behre Gawaahi Laga Huwa

Zair-E- Nishaan Padhthe The Nouha Har Ek Qadam
Maatam Hussain Pyaase Ka Karthe The Dam Badam
Gham Se Larazne Lagtha Tha Jab Panja-E-Alam
Badhthe The Aage Saahebe Maatam Ba Chashme Nam

Faaregh Jo Maatam-E- Shah-E- Waala Se Hote Hai
Phir Kahke Haae Hazrathe Abbas Rote The

Ummul Baneen Ne Naam Jo Abbas Ka Suna
Aankhon Se Noor Seene Se Dil Hogaya Juda
Soghra Ko Umme Salma Ki Aaghosh Me Diya
Boli Mai Badh Ke Poochoon To Ye Maajra Hai Kya

Aqlab Hai Inse Sibte-E- Nabi Ki Qabar Mile
Kis Ke Yateem Aate Hain Paa Nange Sar Khule

Ye Kahke Chund Gaam Badhi Wo Basad Bukaa
Kaandhe Pe Jis Yateem Ke tha Wo Alam Dharaa
Hairath Se Us Ghareeb Ka Mu Dekha Khoob Saa
Beenaai Jaa Chuki Thi Na Pahchaana Mutlaqaa

Poocha Ke Ye Nishaan Tujhe Kab Ataa Huwa
Aye Haamil-E- Alam Mera Abbas Kya Huwa

Ye noha tha ke Abid e Aali muqaam aae
Ghul pad gaya Husain alai his salaam aae
Lo Karbalaee aae, safar se Imam aae
Vo Naaqon pa mujavere Khairul Anaam aae

Lo shio peshvaai e Ahle Haram karo
Soghra utho ziyarat e Shah e Umam karo

Kya dekhti hai uthke vo beemar dil figaar
Abid pidar ke ghode pe sar nange hain sawar
Rumaal rakh ke aankon pe rote hain zar zar
Thame hue rakaab hain do shia naamdar

Boli ke saaf be pidaree ke nashaan hain
Baba kahan hai ye to mere Bhaijaan hain